

July 2025

The Berean

CHRISTADELPHIAN

Vol 007

**Mwili wa Kristo barani Afrika na ulimwenguni
unapaswa kuwa mwili unaolenga kuelimisha na
kutia moyo kwa kupitia katika maandiko.**



...walilipokea neno kwa moyo ulio tayari
kabisa, na kuyachunguza maandiko kila
siku, kama mambo hayo yalikuwa kweli."

**KRISTO ANAKUJA HIVI KARIBUNI NA ATATAWALA
DUNIANI**

KUTEMBEA KATIKA ROHO

**“Kama tunaishi katika roho, na tuenende pia katika roho.”-
Wagalati 5:25**

Barua ya Paulo kwa Wagalatia inazungumza wazi kuhusu uhuru tulio nao katika Kristo. Lakini uhuru huu haumaanishi kwamba tunaweza kufanya chochote tunachotaka. Badala yake, inamaanisha kwamba tuko huru kuwa watu ambao Mungu anataka tuwe. Aina hii ya uhuru inakua maishani mwetu tunapoishi tu na kutembea katika roho.

Kutembea katika roho kunamaanisha kuacha neno la Mungu liongoze kwa kila tunachofanya kila siku. Inamaanisha kwamba maamuzi yetu, mawazo yetu na mambo tunayoyapenda vinaongozwa na maadili ya kiroho sio kwa kile asili ya kibinadamu inavyotaka. Kujua ukweli pekee haitoshi; changamoto ya kweli ni kuishi sawasawa na huo ukweli.

Paulo anaonyesha tofauti kati ya matendo ya mwili na tunda la roho, upendo, furaha, uvumilivu, utu wema, ukarimu, imani, upole na kiasi. Hizi si sifa nzuri tu za tabia; zinaonyesha kwamba Kristo anaishi ndani yetu. Bila sifa hizi, mwendo wetu wa kiroho unakuwa tupu, hata kama tunaamini mambo sahihi.

Ufuasi wa kweli ni zaidi ya kujua Biblia tu, ni kugeuzwa nayo. Kila siku tuna uchaguzi: je, tutafuata tamaa zetu za kibinafsi au tutazizima? Je, tutakuza tunda la roho, au tutasema tu kwamba tunamilikiwa na Kristo bila kuonyesha hivyo? Basi tujiulize: je, roho inaonekana katika jinsi tunavyoishi? Je, watu wanaona mwenendo wa Kristo katika jinsi tunavyotenda, kuzungumza, kujibu na kupenda?



Kutembea katika roho hakutokei kwa kujisikia wenyewe, wala si rahisi. Ni uchaguzi tunaapaswa kufanya kila siku, maisha ya nidhamu na kusudi. Tamaa za mwili ziko kila wakati, hazipumziki wala hazichoki. Hata baada ya ubatizo, asili yetu ya kibinadamu haiondoki. Lakini kile kinachobadilika ni yule tunayemfuata sasa. Tunamilikiwa na Kristo, na hilo linamaanisha lazima tupigane dhidi ya njia zetu za zamani kwa nguvu za kiroho.

Kutembea katika roho kunamaanisha kuweka mioyo yetu wazi kwa Mungu. Inamaanisha kuwa wepesi wa kusamehe, wa kuzungumza kwa kipole, tayari kusaidia na kuwa radhi kuacha njia yetu wenyewe. Inamaanisha kuchagua tunda la roho kama vile upendo, uvumilivu na wema badala ya starehe yetu wenyewe au kiburi. Inamaanisha kuwatendea wengine kwa neema na uvumilivu ule ule ambao Mungu anatuonyesha. Na ikiwa tutakosea kama tunavyofanya sisi sote, hatujibu kwa udhuru. Badala yake, tunatubu kwa kweli na kuendelea kusonga mbele katika roho.

Na lazima tukumbuke kila wakati mwelekeo wa mwendo huu. Kutembea katika roho kunaelekea katika uzima wa milele. Kunaelekea kwa ufalme, mahali ambapo imani yetu itakuwa maono na mapambano dhidi ya mwili yatakuwa yamekwisha milele. Hadi siku hiyo ifike, na tuenende kwa kusudi na kwa azma thabiti kwa yule aliyetoa kila kitu ili tuweze kumfuata. Kwa maana wale wanaoongozwa na roho ya Mungu ndio wana wa Mungu.

KWA NINI WAKRISTADELFIANI HAWAAMINI KWAMBA YESU NI MUNGU?

**YESU ALIZALIWA NA MARIA; MUNGU HANA BABA WALA
MAMA (LUKA 1:30-31; MT. 2:1-5).**

FAQ

Mungu hawezi kujaribiwa kamwe; Yesu alijaribiwa katika mambo yote kama sisi (Yakobo 1:13; Mt 4:1-8; Waebrania 4:15).

Yesu mwenyewe alisema hivyo. Yohana 20:17; 17:3. Yeye si Mungu. Yeye si Baba yetu. Kye ni ndugu yetu. Waebrania 2:11.

Mungu hafi; Yesu alikuwa na mwili wa kufa. Yesu alikufa. Mungu hawezi kufa. Hakuna aliyemwona Mungu; wengi walimwona Yesu kabla ya kifo chake na baada ya ufufuo wake (1 **Tim. 6:16; 1 Wakorintho. 15:5-6**).

Kuna Mungu MMOJA tu, si wawili wala watatu (1 **Cor. 8:5-6; Eph. 4:6; Lk 12:29**).

Luka 14:25-28 |

14:25 *Wakati mmoja umati mkubwa wa watu ulipokuwa ukifuatana na Yesu, yeye aligeuka, akawaambia:*

14:26 *'Mtu ye yote anayekuja kwangu hawezi kuwa mfuasi wangu kama hatanipenda mimi zaidi ya baba yake na mama yake, mke wake na watoto, kaka zake na dada zake; naam, hata maisha yake mwenyewe.*

14:27 *Na ye yote asiyebeba msalaba wake na kunifuata hawezi kuwa mfuasi wangu.*

14:28 *'Ni nani kati yenu ambaye kama anataka kujenga, hatakaa kwanza na kufanya makisio ya gharama aone kama ana fedha za kutosha kukamilisha ujenzi?*

Je, Yesu anafundisha amri mpya ya kuwachukia watu kutoka katika maandiko hayo? Si kweli, hata hivyo mwanafunzi makini wa Biblia angesema kwamba mara nyingi mafundisho ya Yesu yalikusudiwa kuwaacha wasikilizaji wakifikiri.

Basi ni jambo gani ambalo Yesu alikusudia Yesu kuwasilisha kwa umati uliomfuata? Yesu alitaka kufundisha kuhusu gharama ya kumfuata au kuwa mwanafunzi wa kweli. Mwanafunzi wa kweli humweka Mungu katika nafasi ya kwanza na kuweka kila kitu kingine ikiwa ni baba, mama, watoto, dada, ndugu, familia hata marafiki katika nafasi ya pili.

Katika mstari wa 27 Yesu anatutaka tuubebe msalaba wetu na kumfuata.

Je, Yesu alitaka tubebe msalaba kwenye mikufu yetu kama wengine wanavyofanya? Au kubeba msalaba wa mbao au kushona msalaba kwenye nguo zetu? Sivyo kabisa.

Msalaba hapa unamaanisha magumu yanayohusiana na njia ya ufuasi wa kweli. Ufuasi una gharama, na kama hatupitii hili basi ufuasi wetu unastahili kutiliwa shaka.

Kuna faraja kamili kutokana na ahadi ya Mungu kwamba atatupa mahitaji yetu yote.

Marko 10:17-31

Na tuwe wanafunzi wa kweli wa Kristo ili mwanawe atakapokuja kuanzisha ufalme wa milele, tupate kuonekana tunastahili.

Bro Stephen, Kitui Ecclesia

Kutuhusu THE BEREAN

Christadelphian



Masomo ya Mwezi wa Julai

- 1 Samweli,
- 2 Samweli,
- Isaya,
- Yeremia,
- Ufunuo,
- Mathayo na
- Warumi.



Vikundi vya Kusoma Biblia

Hebu tusome Biblia pamoja mtandaoni. Tuna vikundi mbalimbali vya kusoma Biblia, vinavyofaa kila mmoja wetu. Tukisoma Biblia pamoja kwenye WhatsApp, Zoom na katika makusanyiko yetu, tunajifunza kutoka kwa kila mmoja wetu.



Ushirika Wetu

Kwa nini Wakristadelfia hawaamini kwamba Yesu ni Mungu? [FAQ]



Eklezia Zetu Duniani

Ahsante kwa Kazi kwa Eklezia zilizopo Kenya, Malawi, Zambia, Uganda, Tanzania, Marekani, Kanada, Msumbiji, Australia na Papua New Guinea.

Matendo 17:10

Watu wa Berea walikuwa na tabia njema zaidi kuliko wale wa Thesalonike, kwa maana walipokea ujumbe kwa shauku kubwa na kuchunguza Maandiko kila siku ili kuona kama mambo hayo yalikuwa kweli.

MUNGU ANAMAANISHA NINI KWA SAA MOJA?

NDUGU. JOHN SIMIYU

“

*InKatika Ufunuo 17 na 18, kuna kipindi kinachorudiwa ambacho hukumu inatekelezwa juu ya Kahaba na binti zake, Babeli na Mji wake ambao utaharibu biashara; Biashara ya kawaida na udanganyifu [Uchawi - Mafundisho ya uongo]. Hiki ni **Saa Moja**.*

Lakini Mungu anamaanisha nini kwa saa moja?

Kuelewa siri ya saa moja kunatusaidia kuona kwa uwazi zaidi na hata kuelewa unabii wote wa Biblia.

”

Hata **Isaya 54** inazungumza kuhusu mustakabali wa Israeli na mataifa mengine duniani. Hapa ndipo ufunguo wa kufungua fumbo hili. Babeli inawakilisha serikali za kibinadamu na shughuli zake zote, imani na utawala. Ni mfumo wa kidini na wa kisiasa. Mungu anakusudia kumaliza hekima yote ya kibinadamu iliyooza na kuanzisha Ufalme wa Haki wa kudumu ambao hatimaye utarudisha hali ya asili ya uumbaji.

Danieli 2:44 Na katika siku za wafalme hao, Mungu wa mbinguni atasimamisha ufalme ambao hautavunjwa kamwe; na ufalme huo hautaachiwa watu wengine, bali utavunja na kuangamiza falme hizo zote, nao utasimama milele.

Danieli 2:45 Na kama vile ulivyoona ya kuwa jiwe lilichongwa mlimani bila kazi ya mikono, na ya kuwa lilivunja-vunja kile chuma, na ile shaba na ule udongo, na ile fedha, na ile dhahabu; basi Mungu aliye mkuu amemjulisha mfalme mambo yatakayokuwa baadaye; na ndoto hii ni ya hakika, na tafsiri yake ni thabiti.

Huu ni unabii mmoja wa hakika ambao wote wenye haki wanautazamia.
Maana mara utakapotimia basi ahadi katika **Ufunuo 21:4**

Na Mungu atayafuta machozi yote katika macho yao; wala mauti haitakuwepo tena; wala huzuni, wala kulia, wala maumivu hayatakuwepo tena; kwa sababu mambo ya kwanza yamepita.

Ufunuo 21:5 Na yeye aliyeketi kwenye kiti cha enzi alisema, Tazama, nifanya vitu vyote kuwa vipya. Akaniambia, Andika; kwa maana maneno haya ni ya kweli na ya kuaminiwa _ yatatimia. Lakini kabla haya hayajatokea, kipindi hiki cha Saa Moja ni cha kuvutia kuchunguza.

Akizungumzia kipindi hiki Petro anatuonya katika_

2 Petro 3:8

*Lakini, wapendwa, msisahau jambo hili moja, kwamba siku moja kwa Bwana ni kama miaka elfu, na miaka elfu kama siku moja. Tufanye hesabu kidogo. **Siku Moja ina Masaa 24.** Kwa hivyo Saa Moja ni 1000/24 ambayo ni sawa na miaka 41.7 [42].*

Sasa kama watoto wa nuru ambao Paulo anasema katika:

1 Wathesalonike 5:1 Lakini ndugu. kuhusu nyakati na majira, hamna haja ya kuandikiwa

1 Wathesalonike 5:2 Kwa maana ninyi wenyewe mnajua vizuri kwamba siku ya Bwana inakuja kama mwizi usiku.

1 Wathesalonike 5:3 Kwa maana watakapouliza, Amani na usalama; ndipo uharibifu wa ghafla utakapowafikia, kama utungo unaompata mwanamke mwenye mimba; nao hawatanusurika.

1 Wathesalonike 5:4 Lakini ninyi, ndugu, hamko gizani, hata siku ile ikawapate kama mwizi.

1 Wathesalonike 5:5 Ninyi nyote ni watoto wa nuru, na watoto wa mchana; sisi si wa usiku wala wa giza.

Hatupaswi kuwa gizani kuhusu ishara za nyakati, kama vile manabii na mitume walivyokuwa, Mungu aliwadhihirishia mambo haya mapema sana, vivyo hivyo kwetu sisi.

Kipindi cha Saa Moja ni sehemu ya:

1. *Yesu Kristo kurudi kutekeleza ufufuo na hukumu katika Mlima Sinai*
2. *Kupigana na kuokoa Israeli dhidi ya maadui wakati wa vita vya Aramagedoni [vita vya 3 vya dunia]*
3. *Kampeni ya vita vya Yesu Kristo dhidi ya Mataifa kwa ajili ya maandalizi ya Utawala wa Milenia*
4. *Kurudi kwa Israeli katika Nchi ya Ahadi kama ilivyokuwa katika siku za Musa [miaka 40]*
5. *Ujenzi upya wa Yerusalemu kama Hekalu [Nyumba ya maombi kwa mataifa]*

//

Matukio haya yatachukua miaka 50 lakini kuna kipindi cha kimya cha karibu miaka 7 ambacho dunia haitajua kinachoendelea; hii ni ya ufufuo na hukumu. Hii inatuacha na $50-7 =$ miaka 43. Miaka hii 43 ndiyo inayounda kipindi cha hukumu cha Saa Moja juu ya majeshi ya Gogu na Magogu katika Israeli. Mauaji ya watu hawa wanaovamia Waisraeli yatakuwa makubwa kiasi kwamba itachukua miezi 7 kuzika maiti. Baada ya haya, vita vitapiganwa dhidi ya Wakristo wenye uasi, ambao wataamini kwamba Yesu Kristo ndiye mpinga Kristo. Vita hivi vitakuwa mkabiliano wa moja kwa moja ya Vatican na washirika wake.


Tena mabilioni ya watu wataangamia. Cha kushangaza ni kwamba wafalme wa dunia wanaomwabudu upapa na jumuiya ya wakristo watampinga Kristo na watapinduliwa; wengine wakiuawa na wengine kufungwa kwa ajili ya uasi utakaofuata mwishoni mwa miaka 1000. Sasa, wapendwa, tunajua kitakachotokea wakati huu. Lakini vita na hukumu hizi zote zitakapotekelezwa juu ya mnyama, kahaba na binti zake, na waabudu sanamu na wachawi, tutakuwa pamoja na Kristo Yesu, tukiwa sehemu ya malaika watakaopindua serikali za kibinadamu na Ukristo wa uongo.

Heri yetu kama tutabaki pamoja tunaposubiri Siku ya Bwana, ambayo si mbali. Usiku umekwisha karibia na tunakaribia kuona na kushuhudia wokovu mkuu wa Mungu anapoumba mbingu mpya na nchi mpya ambayo itakuwa na haki.





JUL
2025



Berean Christadelphian, Africa

KWA NINI WAKRISTADELFIA HAWAAMINI KWAMBA YESU NI MUNGU?



Ndugu. David Junior

Swali zuri.

1. Katika Biblia Yesu anaitwa mara kwa mara Mwana wa Mungu sio "Mungu Mwana" Biblia daima humtambulisha Yesu kama:

Mwana wa Mungu — (Mathayo 3:17, Luka 1:35, Yohana 20:31).

Mwana wa mwanadamu - ikiashiria asili yake ya kibinadamu (**Mathayo 8:20**).

Mpatanishi kati ya Mungu na wanadamu, mwanadamu Kristo Yesu - (**1 Timotheo 2:5**).

Msemo "Mungu Mwana" haupatikani mahali popote katika maandiko. Unatoka katika imani za karne ya 4, si mafundisho ya Yesu wala ya mitume.

2. Yesu alikuwa na mwanzo; Mungu hana mwanzo.

"Leo nimekuzaa." - **Zaburi 2:7** (pia kimetajwa katika **Waebrania 1:5**).

Mungu ni wa milele, bila mwanzo (**Zaburi 90:2**). Lakini Yesu alizaliwa; alikuwa na mwanzo, akiumbwa na roho mtakatifu ndani ya Maria (**Luka 1:35**). Hakuwepo kama mtu kabla ya hilo.

3. Yesu mwenyewe anakana usawa na Baba.

"Baba yangu ni mkuu kuliko mimi." - **Yohana 14:28**

"Mwana hawezi kufanya kitu chochote peke yake." - **Yohana 5:19**

Tunaweza kumwona Yesu:

Alimwomba Baba (**Luka 6:12**)

Alifunzwa na Baba (**Yohana 8:28**)

Hakujua siku wala saa ya kurudi kwake (**Marko 13:32**)

Swali ni: kama Yesu angekuwa Mungu kamili, angewezaje kujifunza na kunyenyekea/kutii?

4. Yesu alikufa; lakini Mungu hawezi kufa.

"Kristo alikufa kwa ajili ya dhambi zetu." - **1 Wakorintho 15:3**

"Mungu ana uzima wa milele." - **1 Timotheo 6:16**

Kama Yesu ni Mungu na alikufa, Mungu anawezaje kufa?

5. Mungu na Yesu ni Viumbe wawili tofauti wazi wazi.

"Huyu ni Mwanangu mpendwa, ninayependezwa naye." - **Mathayo 3:17** (Ilisemwa kutoka mbinguni)

"Kwetu sisi kuna Mungu mmoja, Baba, na Bwana mmoja Yesu Kristo." - **1 Wakorintho 8:6**

Mmoja ndiye chanzo (Mungu Baba), mwingine ni wakala (Bwana Yesu Kristo). Yesu anatoka kwa Mungu, si sawa naye bali amezaliwa na kutumwa (**Yohana 3:16**).

6. Yesu hatimaye atatiishwa kwa Mungu, ikionyesha kwamba si sawa naye.

"Mwana mwenyewe naye atatiishwa kwake aliyetia vitu vyote chini yake, ili Mungu awe yote katika yote." - **1 Wakorintho 15:28**

African Berean Ecclesia

Habari na Matukio

The Berean Christadelphian
December Mkutano wa mwezi
Desemba utafanyika huko
Kamukuywa, Bungoma, Kenya


Tarehe ni **Desemba 11-14, 2025.**

Mada: Kitabu cha Danieli

Tafadhali tuma mawasiliano ya makanisa ya Afrika kwa:

Ndugu Arthur Wekati,
aw@bereanchristadelphian.africa
SLP 552 Bungoma 50200

Akisaidiwa na
Ndugu Bob Bent;
bob@bereanchristadelphian.africa



Itaendelea mwezi ujao iwapo Bwana atapenda.
